



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Russia den rara tembanger ni
mapa nungi anentsü: Zelenskyy

T20I Rankings: Abhishek & Varun
na maneni temaba jenjang nung lir



VOL. XXII ISSUE NO. 343 (ADOK 343)

DIMAPUR

ROGONÜ (FRIDAY)

RONGJUI (SEPTEMBER) 26, 2025

₹ 5.00

NH-29 nung lenmang shilem ka shibanger

Dimapur, Rongjui/Sept. 25 (TYO): Lenmang tamajungba akumba aser yanglushiba maparen tang teinyakdak aliba mechi Shiva Mandir anasa Old KMC dumping site teküboklen National Highway-29 shibangsü Deputy Commissioner, Kohima, B Henok Buchem-i totuyuba ka agütsüogo.

Brehostibarnü totuyuba agütsüba nung, tarutsü nung sangdong ka magütsü tashi iba lenmang nung gari kata mejajatsü, ta ashi.

Water tanker, military aser paramilitary garitem, compact aser mid-size pickup trucks, mid-

size aser heavy commercial passenger vehicles tem Peducha Bridge-Tsiesema (10 Mile) lenmang leni senzütsü.

Jotsoma Bypass lenmang nung light motor vehicles (LMVs) kisüing senzütsü melatsü, ta DC Kohima ajanga totuyuba agütsüba nung shia lir.

Nüburtem lendong timtem nungi kumzüka ayutsü aser lenmang yanglushiba maparen tetsükdaktsü makai inyaktettsü mechi iba mera ya agir. Iba totuyuba nung aibelener nemozüing agi mela aliba ama merenshitsü, ta Deputy Commissioner ajangasa metetdaktsüogo.

Naga yimten tia asoshi asendenshir inyakti: FNR

Dimapur, Rongjui/Sept. 25 (TYO): Working Committee, NNPGs ajanga "An Appeal to FNR and Sumi Apex Bodies" nüngja agütsür mapang shidak nung sangdong agütsüba asoshi pelar. Onoki iba ya osang sangoktsüba ka ama agizükba kisüing masü saka temulung agüja aser tasü ita asadanger telangzüba agütsütsü nenshia ashir ama lir, ta Forum for Naga Reconciliation (FNR) sangdong ka ajanga ashi.

Naga nunger tanaben lungjemtsüba lenmang ya tasak aser timtem jenti liaka teimla tasen agi sünga lir. Naga Political Groups temi Naga Reconciliation asoshi bendanga agütsür inyakba ya telok balala tsüngta azüdokshi tembangba ajanga sayur aser nübur nem yimjung aser anisüngzük agütsür. Iba ya Naga Political Groups ajanga inyakba lir, ta ashi.

Onoki Naga nunger asoshi tajungtiba bilema inyakdang, metokmeperi inyaksema lir. Nüburtemi onok nem nungloksüba ama teti dangbo onoki meinyaktet aser iba atema onoki ajemalua ozü metokmeperi agizüker. FNR-i aibelena alinungbo ta masü, onoki aibelen mapa inyaka lir, aser iba atema Naga nunger dang ochiba nung tatok meshir.

2008 küm FNR tentetba sülen onoka nenok den külemi jaja arur. Aser iba mapang onok inogo, atsüngzüka ogo aser külemi tajungba kuma melenshia aruogo. Nenok shisatsü ajanga onok melenshitsü, nenok dang temulungtetba tulu aliba ajanga

onok ajungmeso. FNR dak temulung alemba atema kanga pelar, ta ashi.

Küm tetenzüklen Naga Reconciliation process tajungba akum aser Naga Political Groups temi iba inyakyim nung naga tribe hohos tem tongtipang shilem agidaktsütsüka ta February 18, 2025 nung shisa lemsatép.

Yamaji kin balala hoho temi shilem agia yaritepba ajanga reconciliation inyakyim tali tashi itshiogo. Kati ka dak tamang katettsü mechi Naga kin hoho temi NPGs aser tribe hohos tem den ayongzüksü mulungteta Angami Public Organisation-i July 24, 2025 nü Jotsoma nung senden ka ayongzük aser iba sülen Ao Senden-i August 23, 2025 nü Ungma nung ayongzük. September 27 nü Zunheboto nung Sumi Hoho ajanga ayongzüka aliba ya maneni NPGs tem tsüngta kisüing masü saka Naga kintem tsüngta temulung lemtepa aser tamang katepa alitsü asoshi lir.

Naga nunger asoshi tajungtiba inyaksü kanga tongtipang ta mulungsentsü aser tanüla tangatetba nung asenok ajak lir. Kin shiai timtem balala ajangshiaka parnok dak arok ajungtsü asoshi temulungtetba aliba sayur.

Anungji asenok ajak Zunheboto nung adenshia Naga yimten tia asoshi asendenshir maongka agütsüti, ibai telemsa adokba mapang masü lungjemba mapang, arendaka aliba mapang masü tasü aitba mapang ka südaktsüti, ta FNR sangdong ajangasa ashi.

CM Dr. Rio-i NH-29 raksar aliba tekeraba nung yunglutsü tuyu



Nagaland Chief Minister, Dr. Neiphiu Rio-i September 25, 2025 nü Liezocha, Old BRTF (Near Temple) nung National Highway-29 nung alinen alua aliba tesem semdangba mapang tangokba noksa ka yangi angur.

Dimapur, Rongjui/Sept. 25 (TYO): Nagaland Chief Minister, Dr. Neiphiu Rio-i September 25, 2025 nü Liezocha, Old BRTF (Near Temple) anasa National Highway-29 nung alinen agi kongshir aliba tesem semdanga liasü.

Iba anogo CM Dr. Rio meina Deputy Commissioner Kohima, B. Henok Buchem, NCS; Senior Superintendent of Police, Khodi

Rhetso, NPS; Chief Engineer, Akho Zutso aser PWD (NH), revenue aser administrative ketdangsürtem oa liasü.

Iba tesem semdangba mapang Nagaland CM-i ketdangsürtem den raksar aliba highway tang asoshi aser tarutsü asoshi yanglushitsü atema mera agitsü indang jembia liasü.

Tenemlen lenmang ulushia aotsü, alinen agi kongshir aliba

ateptsü aser ministry nungi technical tsütsü mongintem teyari agitsü indanga jembia liasü.

Dr. Rio-i iba lenmang ketdangsüba department dang tekeraba nung yanglushiba maparen inyaksü tuyu aser tekeratiba nung iba lenmang nung gari senzütettsüla, ta ashi.

Paisa Hornbill Festival metenzükdang iba tesem nung metalling bosa renemer alitsü shia liasü.

Ozüing nung aibelener nem tapet temerenshi agütsütsü: Dimapur Police

Dimapur, Rongjui/Sept. 25 (TYO): Facebook amshir kati "Unified Nagaland for Christ" nüngja agütsür aliba Facebook group ka nung takum agitsü amokmerenba aser o tamajung shia züluba dak senakba nung Prof. Rosemary Dzuvichu, Advisor to Naga Mother's Association (NMA) ajanga September 24, 2025 nü Cybercrime Police Station, Kohima nem ken o ka agüja liasü.

Iba osang ngur mera agia tai tonglokja alisang ya jangjateta September 9, 2025 nü apu, ta Commissioner of Police, Dimapur, Aotula T Imchen, IPS ajanga sangdong ka nung ashi.

Iba sülen Cybercrime Police Station nungi ken o belenba sülen Diphupar Police Station nung mapa tamajung inyakba ken o ka benoka liasü. Tai tonglokja alisang Walonir Longkumer (38 years) ya pua police ket nung lir aser maneni

bushisüingdangba mapang lir, ta sangdong ajanga ashi.

Kechi yimya nung südir süaka iba ama amokmeren mapa inyakba ajunga ozüing agi mela aliba ama merenshitsü. Nüburtem tsübodaktsütsü mesüra lendongi yoktsü tebilemba nung inyaksangshiba kechi südir süaka tatok malitsü. Anungji iba ama mapa tamajung inyakba anema tapet mera agitsü ta nüburtem nem sangoktsür, ta sangdong ajangasa ashi.

Gol-i onok nokdangba ya rara sangdongba lir: NSCN-K

Dimapur, Rongjui/Sept. 25 (TYO): NSCN-K ajanga sangdong ka nung Government of India-i par telok "unlawful organization" ta sangdonga ano küm pongu nokdangtsü telemtetba agiba ya rara sangdongba ka lur, ta ashi.

Brehostibarnü Ministry of Information and Publicity (MIP) sangdong nung Maj. Gen. (Retd.) Ang Mai, Nyeiton Konyak aser Kughalu Mulatonu nati aniba teloki ashiba agi, Naga nunger ya kodanga India mesüra British India nung dena meliasü aser tanga India nung maden aser madentsü.

Parnoki sovereignty ya "tasodang nungi aliba temeden aser Tsüngrem nungi aruba senmang ka lir, ta ashi.

NSCN-K ajanga kodanga rara tenzüksü asoshi India nunger litsü

nung inch kata tetsüing majemok aser ozü armed wing ajanga "Naga Country telungzük nung self-defence" atema nok-nü tila dang amshia arur, ta parnoki ashi.

Bendang aina nungi teyari agir ta tai tongloksüba ya tamachi kolok nungi tiaüz olulu prokshiba ka lir, ta ashi.

Armed Forces (Special Powers) Act (1957), Unlawful Activities (Prevention) Act (1967), aser Disturbed Areas Act (1967), aser Naga nunger temeden ajemrepa yutsütsü asoshi benokba lir, ta sangdong ajanga ashi.

"NSCK-K ya ozüing agi memelaba lokti tentet ka ta sangdonga küm pongu atema nokdangba ya rara sangdongba ka lir. Indian armed forces million aika dak tema amshia Naga lima ozüing alema tashiyim

agi amokbangtsü merangba ya iba tendak 'military crime' tamajungtiba inyaksü merangba lir," ta sangdong ajanga ashi.

NSCN-K ajanga Ministry of Home Affairs dang iba totuyuba melenshitsü aser yimtenren tsütsü tatsütep aliba tembangtsü asoshi NSCN-K den mener jembitsü ayongzüker. "Northeast revolution" telok tem den alliance yangluba ya kechi südir süaka inyaksüba mapang, koba küm 50 dak tema nungi amshia aruba yimya ka lir.

NSCN-K ya masü saka Indian security forces aser par agents tem ya 'unlawful and terrorist organisations' ta sangdongtsüla, aser Naga lima nung tashiyim amshia amokbanger aser mapa tamajung inyakerji Government of India ya kisüing lir, ta NSCN-K sangdong ajangasa ashi.

Kevijau Colony nung waste management workshop ayongzüka agi



Dimapur, Rongjui/September 25 (TYO): National Clean Air Programme (NCAP) nung shilem ka ama jana rongtoktsü melena Waste Management aser Composting dak sendakba nung workshop ya September 24 nü Kevijau Colony, Dimapur nung ayongzüka agiogo.

Sustainable waste disposal inyakym aser lokti ajunga kibong aser lokti-i jana achaaayangba nung shilem agitsü ajungmesotsü nükjidong nung iba sentong ayongzüka agiogo. Sentong ya Kevijau Women's Organisation (KWO) tir A. Obangmenla Jamir lenisüba nung agia liasü.

Sentong nung o jembiba mapang EAC Dimapur, Imlijungla-i mopung kanga menena aoba den raratsü atema tzü mopung den apet jana achaaayangba yimya benshitsü nüngdakba lemsatepa liasü. Laisa, anema alitsü atema mopung mereka toktsütsüji ajak dang tongtibangtiba lir, saka gari, industry tem, jana arongba aser tanga meimchir inyakymtem ajanga iba ya amokmerener, ta ashi.

EAC-i, India sorkari apiteta tenzüka NCAP ya mopung

menenba tajemba kümdakja yimtem nisung alitsü asoshi tajungba kümdaktsütsü asoshi lir, ta ashi.

"NCAP takok angutsü atema sorkar, local lokti tentet balala aser tongtibangsa nüburtem longjemer inyaktsü nüngdaker. Lisopur shiai kodang khuret angateta, jana merongi, pei aliba tesem temeket mereka yua, süngtong tema aser libaliro meleshia inyak tenzükdir idangji chichiba temelenshi adoktsü," ta lai ashi.

Maneni lai lokti dang longjemer inyaktsü ajungshia, "asenoki imlaba temelenshiji asen lokti nungi tenzüker. Asenoki tamasa asen yimyattem melenshia asen yongtsü nung jana ajema kümdaktsütsü aser iba sülen temeketi prokshia yoktsüla," ta ashi.

Imlijungla-isa, taruba Run 4 Green marathon indang metetdaktsü, koba District Administration, Dimapur Development Authority, Department of Environment and Climate Change, Nagaland Pollution Control Board, National Youth Climate Consortium, Team Better Dimapur, Can Youth, aser Pro-Rural nunger longjemer September 27 nü agitsü lir.

Sentong nungsa jana kanga junga bendanga anepalutsü koda tongtibang, iba indang jembiba mapang Dimapur Municipal Council (DMC) Consultant Adrian-i, jana rongtokba ya ajak atema lendong lir ta ashi. Paisa, jana ya kanga junga bendena resource kümdaktsütsüla ta ashi. "Kibong shiai jana takong aser tai bendanga teyari agütsütetsü. Jana ajak bin ka nungdangbo mebendentsüla. Asenoki khuret angateta kati ka nem tangazükba agütsütetra asenoki jana ya rongsen kümdaktsütetsü aser Dimapur ya talitsü tajungba aser temerekba kümdaktsütetsü," ta pai ashi.

Paisa, DMC-i jana bendena intoktsü atema mapa inyaker, gari anishir aser diesel totzü nung ita shia sen lakh 48 intoker, ajisüaka jana ya shitak amshira iba yagi rongsen aazüktetsü, ta ashi.

Workshop nung technical session ya Life Ministry Learning Centre-i anir agi, shirnoki composting tasatem sayua liasü.

Workshop ya compost bin lemtsüba den KWO General Secretary Kesovonou-i tepela o jembir tembanga liasü.

Prof. Rosemary amokmerenba lokti tentet balalai aitsür

Dimapur, Rongjui/September 25 (TYO): WJ Longkumer tenüng amshia Facebook page ka ajanga September 23 nü Prof. Rosemary Dzüvichü amokmerenba osang angashia Ao Lanur Telongjem aoksaba sangdong ka ajanga lemsatepogo.

Telongjem-i, amokmerenba mapang amshiba oshi kanga junga asadangogo, koba lephitsü taksüka lir. Iba amala inyakym ya aitsütsü langla lir aser temzüng ozüng kübok merenshitsüla, ta kasa sangdong ajanga metetdaktsü.

Prof. Rosemary Dzüvichü ya educationist ka aser ajaki akümtsübuba social worker ka lir, shiba Naga tsürtem temeden atema nokdakba atema aser talisa Naga Mother's Association Advisor ama inyakba ajaki jangja lir.

Ao Lanur Telongjem-i la amokmerenba aitsür aser Prof. Dzüvichü den nokdaka lir ta ashiba den ochi obendang angutsü atema takokba tashi teyari agütsütsü nangzüko.

Maneni Telongjem-isa,

temzüng ozüng benoka inyaksangshiba ketdangsürtem dang iba ken o ya süoki ia agitsü aser tanaben iba amala inyakym ya mataloktsü atema tapet temerenshi agütsütsü ayongzüko.

Kasa mapang nung Naga Mothers' Association (NMA)-ia, Dimapur nung alir WJ Longkumer-i online post ka ajanga Adviser, Naga Mothers' Association Prof. Rosemary Dzüvichü amokmerenba aitsüko.

Ken o dak sendakba nung Naga Mothers' Association-i temzüng ozüng benoka inyaksangshiba loktitettem dang ken o kanga junga bushisügdanga WJ Longkumer nem tapet temerenshi agütsütsü aser iba den Unified Naga Land for Christ, aser (2) The Chronicles of Nagas ta social media telok ana kong la amokmerenba osang lemsatepogo, iba telok ana indang Administrator/Moderator anema jenjang agitsü takhangba agütsüko. NMA-isa, Prof. Rosemary Dzüvichü

tekümüzüka kübok toktsütsü takhangba agütsüko.

Maneni Aoer tem ajak tenüng nung Ao Senden-i, WJ Longkumer-i Facebook nung Unified Naga Land For Christ telok ajanga Dr. Rosemary Dzüvichü amokmerenba aitsüko.

Tetsürtem jenjang akümtsübua aruba civilized lokti tentet ka nung iba amala nisung ya alitsü tetemsü masü. Iba amala nisung ya temzüng ozüng dak ajemdaker merenshitsüla aser puoka ayutsüla, ta Ao Senden-isa ashi.

Ken o dak sendakba nung Ao Senden-i temzüng ozüng benoka inyaksangshirtem dang aibelena alisang ya pua takaratiba nung merenshitsü mepeshia metetdaktsüko.

Maneni Aoer tenüng menüksüba aser lisopurtem temulung yirutsüba atema Ao Senden-i Aoer sobaliba dak ajemdaker aibelena alir nem tapet temerenshi agütsütsü, ta tir Marsanen Imsong aser Gen. Secy Imtipokym nati külem sangdong ka ajanga metetdaktsü.

Mkg ADC-i azü registration & vaccination drive indang metetdaktsü

Dimapur, Rongjui/September 25 (TYO): ADC aser Mokokchung Municipal Council Chief Executive Officer Atsunga Walling-i sangdong ka ajanga, MMC-i 2025-26 atema kümshia agiba azü registration den repsema vaccination drive sentong jila nung September 26 aser 27 nü ayongzüka agitsü, ta metetdaktsüko.

Vaccination drive ya Department of Animal Husbandry & Veterinary Services aser AWUM den longjemer agitsü. Iba dak sendakba nung ajaki anidaktsü atema tetuyuba kar agütsüko.

Registration aser renewal inyakym ya anepdang 8 ako nung tenzüksü. Iba atema kiyong ajak dang tenügdakba facility tem anepalutsü mepeshia metetdaktsüko. Kiyong shia-i A.H & Veterinary Service Department den longjemer inyaktsü atema nisung anana yoktsüla. Kiyong chairman temi renewal atema registration card nung sign asütsü.

Azü tag dak sendakba nung

taoba senden nung sensak asema ama, azü kiburtem aikati tag jungunga mamshir, anungji taküm atema azü tag tasen ya office nungi angati agütsütsü aser samar alirtemi sen agütsür office nung tagtem agizüktetsü.

Ajisüaka registration tasen asürtem aser card samar alirtem dang tag ya September 25 nü tashi nungbo office nungi agizüksü metetdaktsüko.

Registration tasen/Renewal/ Vaccination taah aser utilisation tah tem ajak taoba mapang ama dang asütsü.

Salangtem, Alempang, Alongmen, Sangtemla, ARKONG, Penli, Dilong Tongdentsuyong aser Sungkomen atema September 26 nü agitsü aser Yimyu, Lijabalijen, Mongaenbai, Kumlong, Kichutip, Aongza, Merepkong, Majalikong aser Artang atema September 27 nü agitsü.

Osang tejangjaba agitsüba atema Dr. Sanen den iba Mobile No. 8258038226 ajanga tongteprateptsü metetdaktsüko.

Kohima District task force-i Food Safety inspection tenzüko

Dimapur, Rongjui/September 25 (TYO): Food safety aser public health tongtibangsüa agitsü atema Safe Food and Healthy Diets dak sendakba nung Kohima District Level Advisory Committee (DLAC)-i bangzüng yangluba dak ajemdaker Food Safety dak sendakba nung Kohima District Task Force-i district kübok food establishment tem asadang tenzüko.

Food Safety & Standards Act, 2006 aser 2011 Rules & Regulations kanga junga benoka inyaksangshitsü nükjidong nung iba inyakym benokogo.

Sentong tenzüker mezügbuba anogo task force-i, Jail Colony nungi tenzüka restaurant aser hotel 11 semdanga liasü. Team yagi tzü jenjang, electronic appliance tem amshiyim, metsümeshidak jenjang, sorchiodak merek memerek, chiyongtsü koda rizünga ayur aser jana koda

anepalua intoker item ajak asadanga liasü.

Meita aoba mapang team yagi, wall menener aliba aser paint shizüka ayuba, exhaust system tem raksar aliba, jana bendendak menembangi aliba, sorchiodaktem glove aser korang mesemi inyakba aser mapa inyakertem medical certificate maliba nguteta liasü.

Parnoki asadangba establishment 11 rongnung hotel pezü aser restaurant ka ket nung dang water analysis report liasü. Iba dak sendakba nung ketdangsürtemi, water quality atema kuli kakat agizüksüji food establishment ajak atema mandatory lir ta lephsia metetdaktsüko.

Task force-isa, food safety standard tem shitak benoka inyaksangshidaktsütsü atema Kohima kübok hotel aser restaurant tem ajak asadanga aotsü ta metetdaktsüko.



Kohima Municipal Council Ward No. 10 Councillor den longjemer Press Information Bureau (PIB) aser Central Bureau of Communication (CBC), Kohima nati ayongzüka Brehostibarnü Officers' Hill Colony, Kohima nung merekmeju sentong ka ayongzüka Swachhata Hi Seva (Ek Din Ek Ghanta Ek Saath) ayonga agiogo.

Leh nung longkak aiter 50 apu; Congress Councillor anema ken o benok



Leh, September 25, 2025: Leh nung longkak aitdang rara adoka nisung pezü asüba sülen anogo ka lir Brihostibarnü Leh nung Ladakh Lt. Governor, Kavinder Gupta leniba nung ketdangsertem senden ka amendang tangokba noksa nung angur.

New Delhi, Rongjui/ September 25 (Agencies): Bodhbarnü Leh nung lanurtemi longkak aitdang rara adoka nisung pezü asü aser nisung 70 dak tali yiruba sülen police-i Leh nung nisung 50 dak tali puogo aser longkak aittsü ajungshiba atema Congress councillor ka anema ken o benokogo.

Central sorkari, social activist Sonam Wangchuk-i jembiba o ajanga longkak aittsü atema lokti ajungmesoa liasü, ta metetdaksü.

Ladakh nung nüburtemi

state jenjang akhanger, aser iba atemaji Centre sorkar den ken o tejembidak mapang nung yimtenren lenir kari timtem agütsür, ta sorkari metetdaksü.

Union Territory of Ladakh nung alirtemi state jenjang akhangba den külemi linük temzüng kübok Sixth Schedule nung züngoktsü atema takhangba agüja longkak aitdang Leh nung Bharatiya Janata Party (BJP) office rongdoktsü aser kima police gari ka rongdoktsü.

Bodhbarnü rara adokba

Bihar nung CWC senden ayongzükba atema BJP-i Congress aitsür

New Delhi, September 25 (Agencies): Congress-i Bihar nung CWC senden ayongzükba ya opposition teloktep nung parnok tongti asütsü nükjidong nung lir, ajisüaka Bihar nung nüburtemi NDA teloktepsa shimtsü, kechiyong parnoki RJD yimsüsüba kübok tetsübu, nisung puer aoba aser ochimashi jenti aliba nguogo, ta BJP-i metetdaksü.

BJP MP aser taoba mapang Union minister Ravi Shankar Prasad-i, küm 85 sülen Congress-i Bihar nung CWC senden ayongzüka amen; RJD yimsüsüba kübok nisung puer aoba, senötsü nung ochimashiba aser state tesem ajaklen kin nung ajemdaker raraba mapang nung kechiba Congress-i ola madok?, ta asüngdang.

tetsübu nung aliba, nisung puer aoba, ayuaba aser ochimashiba nüburtemi nguogo," ta Prasad-i metetdaksü.

Bihar nung NDA sorkari inyakba mapatem nung ajemdaker nüburtemi maneni NDA nem vote agütsütsü, ta pai metetdaksü. Patna nung CWC senden aliba mapang nung Congress Tir, Mallikarjun Kharge-i, BJP-i yimsü nung ajemdaker telemsa adokdaksür aser vote auyar, ta aija liasü.

Paisa, Modi sorkar kübok ochimashi yimsüsüba ya Bihar assembly elections mapang nung tembangtsü, ta metetdakja liasü.

NDA teloktep telung nung mangatettep adoka alibaji nüburtemi metetogo, ta pai ashi.

sülen Leh District Magistrate, Romil Singh Donk-i Bharatiya Nagarik Suraksha Sanhita, 2023 kübok Section 163 benok. Iba ozüing kübok lokti adenshitsü memelar, gari nung loudspeakers memelar aser nisung pongu dak tali adenshitsü memelar.

Ano tanga osang ka nung, Leh nung longkak aitba dak sendakba nung Centre sorkari Sonam Wangchuk indang Students' Educational and Cultural Movement of Ladakh (SECMOL) FCRA license thinentüsügo.

Foreign Contribution (Regulation) Act (FCRA), 2010 kübok Section 14(1) nung ajemdaker pa indang melungtet telok FCRA license thinentüsü.

Wangchuk indang Himalayan Institute of Alternatives Ladakh (HIAL) aser SECMOL-i FCRA telatetbatem anema inyaker, ta tai tonglokja aliba ken otem Central Bureau of Investigation (CBI)-i bushisüngdang tenzükogo.

Tang tashi nungbo FIR mebenok saka CBI-i 2022 küm nungi 2024 tsüngda organization ana jagi bendanglen nungi senötsü anguba osang tejangja asüngdangogo.

Rahul-i Bihar election atema 'Most Backward Justice Manifesto' saya

New Delhi, September 25 (Agencies): November ita nung Bihar assembly election agitsü lia Brihostibarnü Congress lenir Rahul Gandhi-i 'Most Backward Justice Manifesto' saya.

Iba election nung backward nüburtem nem shilem agidaksütsü aser backward nüburtem nem shisaliok agütsütsü nükjidong nung iba manifesto saya.

Lok Sabha nung opposition lenir, Rahul Gandhi-i X ajanga, BJP-i osang tai proker, ta aitsü.

Paisa, Congress party-i backward, Dalit, tribal, minorities aser backward Muslim nunger temeden atema inyaksü, ta metetdaksü.

"BJP-i koba tashika tiyazü jembidir jembiaaka aser asalentong balala yangluaka onoki backward, Dalit, tribal, minority aser backward Muslim nunger nem temeden agütsütsü atema inyaksü," ta paisa metetdaksü.

"Bihar nung kanga backward nüburtem tashi itdaksütsü aser shilem agidaksütsü atema onoki 'Most Backward Justice Manifesto' nung tenangzükba aika metetdakja lir," ta pai ashi.


Rahul Gandhi-isa, "Item nüburtem terenlok atema shisaliok ya tongtibangba, anungji iba sector ajanga parnok tajangzük ngudaksütsü atema bangzüng aika renema lir. Tangbo nija colleges aser universities nunga reservations alitsü. Nija school tem nung menden tesaangbo SC/ST/OBC/EBC kibongtem nungi tanurtem nem agütsütsü," ta metetdaksü.

Paisa, iba manifesto ya shisaliok atema dang masü saka backward nüburtem kasa züngshitsü aser taküm akhümket agütsütsü atema lir, ta ashi,

Bihar yimtiba, Patna nung 'Ati Pichhda Nyay Sankalp' sentong nung Congress-i item tenangzükba metetdakja liasü.

Rahul Gandhi-i, INDIA teloktepi sangdongba onük ter pronglaji EBC nüburtem atema lir, aser Bihar election nung INDIA teloktepi takok ngua sorkar kümra item ajakji mapa küma benoktsü, ta metetdaksü.

Item tenangzükbatem rongnung local bodies nung reservations alitsü aser ozüing alema inyakba mapatem nokdangtsü atema ozüing tasen ka benoktsü densema lir.



September 25, 2025 nü Gautam Buddha Nagar district nung Uttar Pradesh International Trade show sentong nung Uttar Pradesh Chief Minister, Yogi Adityanath-i Ato kilonser, Narendra Modi nem sempet ka agütsüdang tangokba noksa nung angur.

इंडियन बैंक

Indian Bank

ALLAHABAD

ALLAHABAD

Zonal Office : Dibrugarh

T.R. Phukan Road, Chiring Chapori,

P.O.: Dibrugarh- 786001

E-mail: zodibrugarh@indianbank.co.in

KIOJEN

AYOKTSÜ

NOTICE

APPENDIX- IV-A [SEE PROVISIO TO RULE 8 (6)]

SALE NOTICE FOR SALE OF IMMOVABLE PROPERTIES

E-Auction Sale Notice for sale of Immovable Assets under the Securitisation and Reconstruction of Financial Assets and Enforcement of Security Interest Act, 2002 read with proviso to Rule 8 (6), 6 (2) & 9 (1) of the Security Interest (Enforcement) Rules, 2002

Public aser talisa sen apur (tem) aser Guarantor (tem) dang ya sangdonger, tsünglanglen shia aliba kiojen ya Secured Creditor dang mortgaged süa liasü aser iba kiojen ya **Indian Bank** nung Authorized Officer-i agiadokogo aser **31.10.2025** anogo nung "Kong aliar yamaji", "Koma lidir yamaji", aser "Yangji aliba ajak" basis nung ayoktsü. E-auction ajanga ayoktsü aliba kiojen osang tejangja teküboklen agütsür:

Branch	A) Name ef the Borrower/Guarantor/Mortgagor B) Due Amount	a) Details of the Immovable Property b) Property ID No.	a) Reserve Price b) EMD c) Bid Increment Amount d) Any Encumbrances on property
Dimapur	A) Borrower- M/s. Aki Automotives India Private Limited {Directors: (1) Mr. Kiyelu Sumi and (2) Ms. Kimiyetoli Achumi}, Address: 5th Mile, Near Faith Service (Indian Oil Petrol Pump), Dimapur (Nagaland), PIN- 797115; Director & Guarantor- Mr. Kiyelu Sumi, S/o Lt. Kikheto Sumi, Address: H/No. 128, 4th Mile, Diphupar A, Dimapur (Nagaland), PIN- 797115; Director cum Guarantor cum Mortgagor- Mr. Akato Sumi, S/o Lt. Kikheto Sumi, Address: H/No. 53, Thilixa Village, Block 1, Dimapur (Nagaland), PIN- 797111; Guarantor- Ms. Nukshikala Jamir, W/o Akai Aye, Address: H/No. 53, Thilixa Village, Block 1, Dimapur (Nagaland) PIN- 797111; Guarantor- Ms. Kimiyetoli Achumi, D/o Shri Atobo Achumi, Address: H/No. 128, 4th Mile, Diphupar A, Dimapur (Nagaland) PIN- 797115 B) Rs. 4,35,67,621/- (Rupees Four Crore Thirty Five Lakh Sixty Seven Thousand Six Hundred and Twenty One only) as on 22.09.2025 with further interest, costs, other charges and expenses thereon.	a) Dimapur, Nagaland nung Faith Hospital anasa Sewak Gate nung Akato Sumi tenüing nung aliba kiojen aser yangji aliba ajak, ali tasazük 2377 sqft, Patta No. 1484, Dag No. 107/1647, Mouza No. 02, Block No. 09 vide Registered Sale Deed No. 2425/10 anogo 22.10.2010. Artsü yamai lir:- North tsütsülen Mr. Sukhato Sema'er kimong, South tsütsülen Meis Honglung Damel, East tsütsülen Mr. F. Pathwari aser West tsütsülen Main Road, Sewak Road. b) IDIB50482809247	a) Rs. 2,49,22,000/- (Rupees Two Crore Forty Nine Lakh Twenty Two Thousand only) b) Rs. 24,92,200/- (Rupees Twenty Four Lakh Ninety Two Thousand and Two Hundred only) c) Rs. 50,000/- (Rupees Fifty Thousand only) d) Not Known any

e-Auction Anogo & Mapang: 31.10.2025 anogo nung nikongdang 1:00 ako nungi 5:00 ako tashi aser mapang telatet makai minute 10 atsülangtsü

EMD amout agütsütsü atema tatembangbuba Anogo & Mapang: 31.10.2025 nikongdang 05:00 ako tashi.

Telatetbatem tejangja atema yangi tongtepratepang Branch Manager : (A) Dimapur : 8003441456; (B) Zonal Office Dibrugarh: 9628610699

Bid asütsüpurtem dang website (<https://baanknet.com>) nung onok indang e-auction service provider PSB Alliance Pvt. Ltd. ajanga online ajanga bid asütsü metetdaksür. Technical Assistance atema **8291220220** nung call süang. Registration status aser EMD status atema support.baanknet@psballiance.com dangi email süang. Kiojen osang tejangja den kiojen noksa aser auction indang telatetbatem jangjatsü atema <https://baanknet.com> nung reprangang aser iba portal dak sendakba metetpelatsü atema PSB Alliance Pvt. Ltd. den **Contact No. 8291220220** ajanga tongtepratepang.
Bid asütsüpurtem dang, website <https://baanknet.com> nung kiojen bushiba mapang nung tekalen shia aliba Property ID Number amshitsü metetdaksür.
Date: 22.09.2025, Place: Dimapur

Authorised Officer (Indian Bank)



TIR YIMYIM YIMOBILEM (EDITRIAL)

DIMAPUR FRIDAY, SEPTEMBER (RONGJUI) 26, 2025

Tokolok nung timtem

Tanü asenok rongnung timtem ka jet ta reprangteta anepalutsübaji nisung aika tokolok nung timtem aliba ya asütsü. Iba timtem indang jembidang, asenoki tokolok nung timtem aliba aser tokolok meshitaki akümba na ya bendangtetsüla. Atangji, tokolok meshitaki akümbajibo yiar saka tokolok nung timtem alibajibo yiar amato saka yiarbo masü saka pa mesüra laji tokolok nung timtem aliba agi shiranger. Aji oda, yashi yakanü ka Aoer chanu kati Nagatsür ka taküm samatsütsü amato amokmerena 'social media' nung sangdongbaji, kodang jungjunga bilemdangdir, paji akhi (normal) masü saka pa mulungjang aser tokolok nung tipmatem timtem lir ta angateter. Atangji, tokolok nung timtem alirtemi o mashi mashi jembiba aser nisung taküm samatsütsüsa amokmerenbaji zübazüba bilema odang yutsütsübaji masü saka jet ta tapet mapa inyakdoktsüla, kechiyong loktiliba nung timtem lendongji tokolok nung timtem alirtem jagi bener arutsür. Ajisüaka, parnokji asenoki yiar amato bilema amshira ajia tim masütsü aser ano tokolok nung timtem alirtemji tangar ozüing raksartem den külemi puoka yura, aji agia, ashiko, timtem lendongang tali ataloktsüa akok. Tanübo itemji tesayur, police aser tanela nung lenirtemi dang masü saka asenok tsüraburtemia angatetsü kanga nüngdaker. Aiben asenoki tim masüba mapatem ajak moijung nem tongloktsür, ajisüaka tokolok nung timtem alibajibo, ashiko asenok tsüraburtemi tanurtem tebilemba aser nüngdak mangatet ser jashidaksüba agi tanurtem kolok aser mulung animesüngzükteti akümba asütsüa akok mesüra yimten aser lokti nunga yimsüsür, kedangser aser lenirtemi parnok kübok alirtembo hau ta mali, akhi asen tsüraburtem kentula (nursery rhymes) nung 'otsü na tazü tazü shima chir, tamen tamen kü nem kua,' ta atenba amato, tamen tamen tagitsü ajak pei agitsü bendena yur, tazü tazü tachi majung aser tamagitsütem nübortem nem agütsüba mezüngmeshi mapatem ngur, talisa, lanurtem mulung aser tokolok tipmetemi kümdaksüba nungi tenzüka timtem asütsüa akok. Aji dang masü saka kibong nunga apuani tsüngda, kinungbo kanga sashiba agi mesüra mazüok senzüba agi kinungtsü temulung shirangdaksüba nungi kinungtsü tokolok timtem tenzüksüa akok, kasaji kinungtsü kanga tesashi aser awashi aser sobaliba memetetba agi kinungbo mulung shiranga tokolok nung timtem adoktsüa akok. Ano, tanü asüng lanurtem tokolok nung timtem adokbaji, shitakba nung kinunger aser medemertem den ajurutepa otsü atonger masü aser mapa nunga külemi nokdaker masü saka pei pei takdang nungi dang internet ajanga computer aser smart phone nungi dang alima tesem balala nungi meteta alir dang masü saka memetetba nisung dena ajurua sensaksem tenzüka tembar yimteper, ano karbo amuia mao amang piyong mobile nung mechioker games asayatsü, noksa tamajung reprangtsü, chiyongtsü yangluba reprangtsü aser shiti züluteptsü ta shitak asangsang lima nung masü saka mobile (virtual) lima nung dang aliba agi, parnokji akhi (normal) nisung memesüki akümer. Itemji anüngdang mejangtsü aser aonung memejangi ano par online lima jagi aotsü. Iba ama alima balaka nung sobaliba balaka tenzüka agi, parnokji yi aser mozü lar amai kümadoker, saka parnokji alcohol aser drugs addicts masü saka tokolok nung timtem agi atongbatem lir. Item jagi lokti mejangrar, kinungertem den külemi mekazüner aser sentepi aotsübo otsü maka. Asenoki item denji nüchi amato bilemra asenoki parnok dang kanga jashitsü aser ano asenokang tali tim atemtsü. Ano, külen asenoki parnokji yiar amato bilema amshira, iba jagiang parnok tamajungba dang kümadoktsü. Ano, asenoki parnokji satani apu amai bilema satan dang arütsüa mongra, iba jagia tesünep mangutsü. Atangji, tokolok timtemjia sarasadem agibo akoktsü, anungji asenoki tokolok nung timtem aliba purtemji jet ta reprangteta temeim agi parnok den o tajung jembia parnok tebilemstü aser taginüba shiitakja lemsatepra, iba jagi parnokia sarasademstüji mulungsua agizüktetsü. Atangji, iba ama timtem ya zünga shia metetertermi anepaluba tetka maka, anungji asenoki 'psychiatrist' nungia teyari agitsüla. Iba ama anepaluba ya tokolok nung timtem aketerterm kisüng atema masü saka asen kibong aser lokti tesünep aser tepela nung alitsü anepalur ta bilema inyakdi.

OLEMSABANG

AROGOTEMI SENTEM AMSHIBA

~ P. Renthly Jamir.

(Yashi adok nungi...)

Item ya kechiba ataloker ta bushidanga ora asenoki sen ya tangua mangu temeteta memetet ta aliba onsara tengunüsen tali senarua apayua amdangba agi sen ta aja. Aser tanü tashi sen apushiba temzüng tesashi koba linük nung yanglur amshir agi memetetba agi (Money lender act) lokti mashi-i kati nisung mashi-i kati mungdangi arogotemi parnokki mulungba sentem keter sen apushia amshir.

Iba mapa ya linuk temzüng agi khenyongi memelar. Kechiyong na sen aika lir tasür tapi agi ne mulungka agi sen tetemlok keter aputsütsü ozüing agi memelar. Tang sen aputsüba linük temzüng bener arudi The Nagaland Money Lenders Act 2005(Act no 6 of 2005). Iba temzüng(Act) nung nübur ajaki meteta alitsü tongtimbang onük kar agiteta yangi tareni zülür Temzüng Act No 3. - License sen aputsür (money lenders) ajak government nungi temelaba license lir dang aputsütsü akok. Iba license ya küm shia tasen yanglutsü. License makari sen aputsütsü makok.

Temzüng Act No 5. Change of place - Sen aputsür ka jelia memetetdaksüi (previous notice) talidak tesem melenshitsü makok. Tetezü pai koba area tashi nung sen aputsütsü license agi melar iba tesem nungji dang sen aputsütsü akok. Mokochung license Tuli nung amshitsü memelar.

Temzüng Act No 6. Sign Board - Sen aputsür license nung aliba tenung tejangja zülur par token kima(outdoor) jara/kishi nung neploka ayutsü ano sentsüh (debt collector) sarua aotsüpur kar lira pa nüngji dena zülur ayutsü. Temzüng Act No 7. Interest sentem ita shia masü küm shia(per annum) agitsü sen aputsür shingaia 3% dak tali(dang Bank rates) magitsü(prevaling average bank rates) sentem sentong nung dang agitsü(simple interest on the principal amount of the loan) Tatsütiba nung sen apushiba temzüng asenoki angazükogo. Iba den sentakba State Bank of India sentem interest tongtimbang kar reprangdangdi.

India nung Bank ajanga sen aputsüba (SBI Loan) ya mapang shia luli atuli ta melenshir. Tongtibangsa SBI loan item nung ya aputsür Personal loan - interest rates küm nung 7.75% nungi tenzüker 10.10% aser 15.10% tashi nung aputsür.

Home loan - interest rates 7.75% 8.50% nungi 9.65% tashi aputsür.

Ano Auto loan ta Student loan ta Pension loan ta tapu aika tetemlok balala agi aputsür. Nubur tanguba yari balala tetemlok aputsür. Anungji Government of Nagaland Money lenders Act 2005 agi sen aputsürtem sentemji ita shia masü küm shia tetemlok agitsü melar. Ano State Bank of India koba tetemlok agir iba nung 3% dak tali agitsü memelar. Tatishitsü SBI küm nung interest 10% agira nija aser telok sen aputsürtemi teimba agi 13% tetemlok keter aputsütsü Act jagi melar. Sen aputsütepba mapa yagi nisung aika timtem ajurur kechiyong sentem ya nübur maochiba nisung aika machiba magiba nung tesama tia ajuruba ka lir. Anungji Governmenti ozüing takang tesashi yanglua agi beshir aser tamangertem asoshi Tsüngremia ozüing tesashi aguja sentem mamshitsü nokdangba asenoki lai nung tejangja angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

European Evangelical Alliance (EEA) nung Ukraine-azüngsemogo



August ita nung Ukraine National Day anogomong nung European Evangelical Alliance nungi lenirtem aser Council of Evangelical Protestant Churches of Ukraine nungi lenirtem tangokba noksa nung angur.

September 25, 2025: September 17, 2025 nü European Evangelical Alliance (EEA) mungdang nung vote agütsütepba sülen Ukrainian Evangelicals-a EEA nung denogo.

Council of Evangelical Protestant Churches of Ukraine (CEPCU)-i EEA nung adentsü atema tesüiba küm asem tashi jembishinüa aruba sülen tang tesüsa EEA nung official süa züngsem kümogo.

Ukrainian Evangelicals-i EEA nung adenba ajanga Europe nung evangelical Arogotem tsüngda telongjem tashi taitba akümtsü.

CEPCU-i sangdong ajanga, "Ukrainian Evangelical Protestant Churches-a EEA nung züngsem ka akümba ajanga alima tesem ajaklen amalitepa inyakba jenjang tajungba akümtsü, longjemer kulisüba wadang inyaktsü aser Europe nung dang masü alima tesem ajaklen tamangba yimsü temeden kümzüktsü atema inyakttetsü," ta metetdaksü.

2022 küm nungi Ukraine nung Evangelical lenirtemi EEA indang 'Hope for Europe' sentong nung dena arur. 2023 küm Warsaw nung iba sentong agiba mapang nungi tesendaktep tajungba aküm aser 2025 küm EEA co-secretary general, Jan Wessels-ia Ukraine anaben semdanga liasü.

EEA co-general secretary, Connie Duarte-i, "Parnoki EEA kibong nung adentsü yongyaa liasü aser onokia parnok agizüktsü melunga liasü. Tesüiba küm asem tashi raraba mapang nung National Evangelical Alliances aikati parnok (Ukraine) den tongtepratepa aruogo. Tang tesüsa longjemba atema pelar," ta metetdaksü.

Russia-i Ukraine amakba atema mapang shia European Evangelical Alliance-i Russia aija arudar aser Ukraine atema sarasademja arudar.

Tangbo European Evangelical Alliance nung Ukraine aser Russia naprongla züngsem kümogo.

Jaipur nung aliba Bible training centre ka nung Khristan lenir 2 apu

September 25, 2025: September 23, 2025 nü Rajasthan yimtiba, Jaipur nung Bajrang Dal züngsemtemi theological training centre ka mita aoba sülen ketdangsertemi Khristan lenir ana puogo, ta osang ka ajanga metetdaksü.

Bajrang Dal nung züngsem 100 dak temai Hindustan Bible Institute ji longbangba ajanga educational program ka thinentsüsa aküm.

Iba tatalokba sülen ketdangsertemi training center semdanger Hyderabad nungi Pastor Ashish aser local pastor ka apu. Chennai nung aliba tongti institute aser Banswara branch nungi administrators-i Hindustan Bible Institute ji semdanga aliba mapang nung Bajrang Dal züngsemtem telok ana lemsar nisung 40 institute telung jagi ai aser tanüngba nisung 60 shii institute ji longbanga liasü.

Bajrang Dal züngsemtem jagi, iba Institute telung nungji ozüng alema Khristan yimsü dangi meyipdaksür, ta tai tongloktsüba sülen police-i Institute nungi electronic osettem, documents aser staff tem indang osettsüset ajak apu.

Hindustan Bible Institute ya 1952 küm Dr. Paul V. Gupta-i tenzüka liasü.

Iba Institute indang tongti campus ji Chennai nung amenoka lir aser linük tesem balala nunga branch amenoka lir. Iba organization-i theological education programs ayongzüka agir aser state balala nung graduates 13,000 dak tema nem training agütsüogo.

Bajrang Dal züngsemtemi iba Institute mita aoba sülen Area Commander leniba nung sepaitem aser osangbenertem iba tesem jagi oa liasü. Iba dak alia Khristan lenirtema aika iba tesem jagi oa ozüng benokba ketdangsertem den jembishinüa liasü.

Tesülen police station nung longkak aitertem aser Khristantem adenshia tensa süngjemtsü atema parnok tsüngda ken o jembia liasü, ajisüaka aonung tashi nung telemtetba magitet.

September 21 nüa kasa kiyong nungji Khristantem sarasademba mapang nung Hindu nunger telok kati pastor Daniel densema Khristantem dak azük.

Social activist, Sawai Singh densema meimchir temeden atema inyakertem aser Khristan organizations balala nungi lenirtemi police ajurua tensa aziüktsü mepishia liasü.

Tawa Rajasthan kübok

Dungarpur, Kotputli-Behror, Alwar aser Anupgarh district tem nunga Khristantem rejutem anema inyakba tatalokba 9 lir.

Tan ita tetenzüklen Rajasthan state Assembly nung Rajasthan Prohibition of Unlawful Conversion of Religion Bill, 2025 ta ser anti conversion ozüng tasen ka agizükba sülen Khristantem anema inyakba bulua ataloker.

Iba ozüng kübok ozüng alema tamangba yimsü meyipdaksürtem taküm piyong tepuokdak ayutsü akok aser senchi crore 1 tashi achitsü. Iba bill kübok ashikülak lenmang balala ajanga tamangba yimsü meyipdaksürtem küm 7-14 tashi tepuokdak ayutsü aser senchi lakh 5 tashi achitsü. Ano tetsür-tanurtem, SC, ST nisungtem aser matamabensartem yimsü meyipdaksüra aibelenertem küm 10-20 tashi tepuokdak ayutsü aser senchi lakh 20 tashi achitsü. Ano aiben aibelener dangbo senchi lakh 50 tashi achitsü.

Iba bill kübok ozüng alema yimsü meyipdaksütsü atema amshiba kiojentem pua ayutsü atema ketdangsertem nem tashi agütsür. Aibelenba rejutem aser melungtet teloktem indang licences thinentsütsü aser senchi crore 1 tashi achitsü.

ANOGO ABEN TSÜNGREM DEN

Pai ya Inyaktsü

Nü mapa nung Kibuba molung kadakjang; Ano pa daka amangang aser pai aji atalokdaksütsü.

(T.Ken. 37:5)

Kechi inyaktsüla Pa dangi bener arung. Koba mapa agi nü dangi tajungtiba benür arutsü aser pa tematiba nung sentsüwangshitsü iba mapaji Tsüngrem-i nü dang inyaktsü. Kecha tarendaksü mali Tsüngrem-i ne taküm nung inyakdaksünüba kar alitsü. Pai aji bilema aruogo, iba indang pungmanga liogo aser sarasademogo. Tsüngrem-i asenok asoshi mapa inyakdaksünüra aser asen dak aser asenok ajanga mapa atalokdaksünüra asenoki tetuyuba kar anidaktsüla. Mezüngbuba, asenoki asen leman Kibuba nüm nüngloktsütsüla. Ibaji tejangja asen temolungtetba asütsüla. Asenoki aji Kibuba nem magütsür aser tanaben meyiba agir aser aluyimeri metsü yoker mokua atu matu reprangba ama repranger. T a n a b u b a , asenoki Tsüngrem dak temulong alemtsüla. Iba tetezü kechi ? Iba tetezü pa tesüngmangtsü Tsüngrem ta angateta pa tenangzükbatem nung amangba. Asenoki jakla tajung aser parnok mapa ngur asenoki nisungtem dang temolong alemer. Tsüngrem jaklaji tetemjen, aser pa mapa tetemjen. Tasembuba, asenoki Kibuba dang ataa alitsüla. Kodang pai inyakner idangji inyaker. Martin Luther-i yamai ashir, "Tsüngrem dang ola madoki liang, aser pai na soetdakjang." Kibuba dang ataang. Pai na asoshi inyakdang ne dak na ajanga inyaker. Bendanga agüjang, temolong lema liang, aser ataang, aser pai ataloktsütsü.

Gaza nung Arogo lenirtemi aienshitsu memelunger

September 25, 2025: Tang Pontifex-i, "Temeshi Lima Gaza nung tensa tamajungba shilem ka nungbo tang anünga akümba nung ajemdaker United Nations-i nüburtem dang aliba Khristantem ya dang lir. Ibayongji parnoki iba tesem nungji Khristantem mesamatsü atema nokdaker," ta metetdaksü.

Tang Holy Family Arogoi rara ajanga jenshia alir nisung 450 shi yaridar.

"Israel-i iba tesem nung alirtem dang aienshitsu tuyur, ajisüaka Gaza nung tesem ka danga kümzüka mali. Anungji Khristantemi Arogo compound nungi mainshitsu telemtetba agibaji kanga shisa kaa lemtetba lir," ta Latin Patriarchate-i metetdaksü.

Akroush-i, "Iba tesem toktsür aoertem rongnung karibo tensa tamajung ajangshidar. Lenmang tiyong nung süki meyanga lir, merükmeju mali aser chiyungtsü agi anünger. Tesem ajaklen nisung jenti asür," ta metetdaksü.

September 16 nü UN Independent Commission of Inquiry-i, Israel sepaitemi 1948 Genocide Convention kübok Act pongu nungi pezübo inyakadokogo, ta metetdaksüogo.

Tang Parnoki EEA kibong nung adentsü yongyaa liasü aser onokia parnok agizüktsü melunga liasü. Tesüiba küm asem tashi raraba mapang nung National Evangelical Alliances aikati parnok (Ukraine) den tongtepratepa aruogo. Tang tesüsa longjemba atema pelar," ta metetdaksü.

Russia-i Ukraine amakba atema mapang shia European Evangelical Alliance-i Russia aija arudar aser Ukraine atema sarasademja arudar.

Tangbo European Evangelical Alliance nung Ukraine aser Russia naprongla züngsem kümogo.

Tang Pontifex-i, "Temeshi Lima Gaza nung tensa tamajungba shilem ka nungbo tang anünga akümba nung ajemdaker United Nations-i nüburtem dang aliba Khristantem ya dang lir. Ibayongji parnoki iba tesem nungji Khristantem mesamatsü atema nokdaker," ta metetdaksü.

Tang Holy Family Arogoi rara ajanga jenshia alir nisung 450 shi yaridar.

"Israel-i iba tesem nung alirtem dang aienshitsu tuyur, ajisüaka Gaza nung tesem ka danga kümzüka mali. Anungji Khristantemi Arogo compound nungi mainshitsu telemtetba agibaji kanga shisa kaa lemtetba lir," ta Latin Patriarchate-i metetdaksü.

Akroush-i, "Iba tesem toktsür aoertem rongnung karibo tensa tamajung ajangshidar. Lenmang tiyong nung süki meyanga lir, merükmeju mali aser chiyungtsü agi anünger. Tesem ajaklen nisung jenti asür," ta metetdaksü.

September 16 nü UN Independent Commission of Inquiry-i, Israel sepaitemi 1948 Genocide Convention kübok Act pongu nungi pezübo inyakadokogo, ta metetdaksüogo.

Aid to the Church in Need (ACN) nung public affairs tongti, John Pontifex-i mapang shia putir Gabriel aser Latin Patriarchate of Jerusalem, George Akroush na den tongteprateper.

Osangbener den jembidang

AO OSHI ANGAZÜKDAK:**TANÜ ANGAZÜKTSÜBA OJANG****Tezüngkang**

(v) kanga meyaka ketdangsütetba (economic in management)

* Kütsü kanga tezüngkang tetsür ka liasü.


Tezüngyang

(v) temulung nung junga yutetba (good in memory)

* Tezüngyang nisungi tatalokbatem mamar.



Tir Yimym

OLONG PAITEP # 7282**TIPIEN**

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünusenbongsü adokdak - (3)

OLONG PAITEP # 7281 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Sürä.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Taju, 21. Ano,
22. Onü, 23. Kua.

**ALOKBA TATIDANG KA AGÜTSÜR**

Tesayur : Ni nenok dang tasüngdangba kadang asüngdangtsü meranga langzüang: Tanü-asüng asen lima nung JCP-i ali tululu onzükli, bener or jaka tanga ka nung intokli ta asüba yagi meimchir yimya nung kechi mesük ?

Alokba : Ena! Tanü asen Naga nunger sorkar tenzüker tulur aikati department rongsen aika mejepzükli, bener oor India lima tatemlen mozüki tulu ka nung intokli ta asüba yagi kanga mesüker.

Tesayur : O Takoker Alokba !

Lilir : I. Kilang Ajem, Indisen, Dimapur.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

Zubeen asüba ken o CBI nem agütsütsü akok: CM Sarma

Guwahati, Rongjui/

September 25 (Agencies):

Kentener Zubeen Garg asüba ken o bushisüngdangtsü atema nüburtem takhangba tali akümbe mapang ka nung Chief Minister Himanta Biswa Sarma-i, aremzüka atatsü mepishiba den ochi obendang agütsütsü ta tenangzüka agütsüo.

Sarma-i ashiba agi, "SIT nem mapang tatsüka agüjang. SIT-i kecha minyktetra aser Assam nungertem temulung mesüra onoki ken o ya CBI nem agütsütsü asoshi inyaksü."

CM Sarma-isa, asür Zubeen indang jurila aser digital account tem amshiyim dak sendakba nung osang prokshia aoba indang ken o jangjashitsüo. Pai ashiba agi, Zubeen Garg kinungtsü, Garima Garg-i pa

indang social media mesüra tanga jurila asset tem azüoktsü atema sorkar nem temepishiba kecha magütsü.

CM Sarma-i, "item ya Siddharth Sharma ket nung lira aser pa kinungtsü Garima Garg nem agütsütsüa süra lai kecha temepishiba agüja mali. Iba dak sendakba nung par kinungertemi langka kar danga nüngdakra Garima Garg-i tongteprateptsü, kechiyong Commissioner of Police-i la den anogoshia tongtepratpa arudar. Tangbo par kibongi ochi obendang atema dang temepishiba agütsür lir," ta ashi.

Nüngtugu kentener Zubeen Garg asüba ken o bushisüngdangtsü atema Assam sorkari Special Investigation Team (SIT) ka tentetsüo, ta

Chief Minister Himanta Biswa Sarma-i Bodhbarnü metetdaksü.

Kentenersang ajungbena asüba dak sendakba nung tia tensatem asadangtsü asoshi nüburtemi takhangba agütsüba mapang sorkari tang iba jenjang agiogo.

SIT ya Special DGP (CID), M.P. Gupta lenisüba nung inyaksangshitsü aser Rosie Kalita, SSP (CM Vigilance), Chief Investigating Officer asütsü. Additional SP, DySP, Inspector aser Sub-Inspector tem densema senior police officer tem aika iba team nung densema lir. Iba ken o ya CID PS Case No. 18/2025 kübok inyaksangshitsü, koba Bharatiya Nyaya Sanhita, 2023 kübok sections 61(2)/105/106(1) nung ajemdaker benokogo.

Manipur nung rakzükrakdemer ana apu

Imphal, Rongjui/September

25 (Agencies):

Central security force tem aser Manipur police longjemer state kübok lenden nung amendaker aliba telungpur telok den sendaka aliba nisung ana puogo. Tena ket nungi rakzükrakdemba sen, two-wheeler ka aser mobile phone ana ngutetogo, ta ketdangsürtemi Brehostibarnü metetdaksü.

People's Revolutionary Party of Kangleipak züngsem Naorem Abinash Singh (20) ya Kakching District kübok Kakching Sumak Leikai, Naodam Bazar nung par kidang nungi Bodhbarnü pua

liasü;

Sepaitemi pua alisang yagi Kakching nung shishilemar ka dang nungi sen 5000 meshia liasü. Pa ket nungi mobile phone ka, yangkhu ka aser wallet ka puogo.

Tanga meit aoba sentong ka nung People's Liberation Army (PLA) zübingsem ka Bishnupur district nung Moirang-PS kübok Tronglaobi tesem nung apu. Bishnupur district kübok Chingmei Awang Leikai nungi Salam Kipjen Singh (45) den pa ket nungi two-wheeler ka aser mobile phone ka puogo.

Kasa mapang nung tanga sangdong ka ajanga, September

19 nü Bishnupur district kübok Nambol Sabal Leikai nung 33 Assam Rifles mendanga atar amakba indang bushisüngdangba sülen aija alir rongnung ka puogo, ta police-i metetdaksü.

AR amakba mapang amshiba prangbong aser injangtem ngutetogo. Osang ajangsa, iba ken o dak sendakba nung taoba mapang noksa sayaba ya morphed/ photoshopped sür liasü ta media nung nüburtemi comment süa liasü, ta ashi. Ajisüaka police-i ashiba agi, noksatem ya yanglushir yokba masü ta jangjashitsüo.

Mizoram CM-i NE nung handloom ajungkettsü tasa lemsatep

Aizawl, Rongjui/September

25 (Agencies):

Mizoram Chief Minister Lalduhoma-i Bodhbarnü Northeast nung handloom aser handicraft sector ajungkettsü atema Northeastern state tem densema council ka aser Centre ka tentetsü benokdangogo, ta official sangdong ka ajanga metetdaksü.

Nagaland Chief Minister Neiphiu Rio lenisüba nung handloom aser handicraft dak sendakba nung high level task force virtual senden ka nung jembiba mapang Lalduhoma-i ashiba agi, pai aniba sorkari handloom aser handicraft renloka odaktsütsü aser

ajungkettsü atema tesemtem jangjaogo, ta kasa sangdong ajanga metetdaksü.

Pai, handloom aser handicraft ya Northeast nung aliba state ajunga ayimjema telok balala küma lemsar renlokyonga odaktsütsüla aser agency ka tentetsü, kobai export asadangtsü, ta ashi.

Lalduhoma-isa, Northeast state tem aser Centre sorkar densema council ka tentetsü benokdang. Iba council yagi handloom aser handicraft ajungkettsü atema state tem Centre den longjemer inyaksü asoshi lenmang lapoktsütsü. Paisa, e-commerce takok ngua

amshitsü benoka liasü.

Senden nungsa Northeast nung handloom aser handicraft sector terenlok atema onük balala benoka sensak asem aser tarutsü atema sentongtem yanglua liasü.

Handloom aser handicraft dak sendakba nung high level task force ya DoNER ministry kübok tenteta liasü. July ita Lalduhoma-i, Northeast nung aliba state tem rongsenketzüng terenlok atema handloom aser handicraft sector ya kanga tongtibang asütsü ta ashiba den NE ya alima ajungai meteta akümbe textile hub ka akümtsü imlaba lemsatepa liasü.

Russia den rara tembanger ni mapa nungi anentsü: Zelenskyy

New York, Rongjui/Sept. 25 (Agencies): Ukraine Tir Volodymyr Zelenskyy-i Russia den rara tembangba sülen tir menden nungi alutsü ta ashi, anungji pa nükjidong ya Ukraine tir inyaktsü masü rara tembangtsü ya lir ta angateter.

"Kü nükjidong ya iba rara tembangtsü lir, office asoshi maneni tokteptsü masü," ta pai Axios dang ashi.

Pai iba o ashiba ajanga pa yimsüsüba menden nung mapang telatet alitsü tebilemba masü ta tejangja sayur. 2022 küm Russia-i tashi ajak amshia amak tenzükba sülen alimai kanga jangja metetsang Zelenskyy ya metemsü lenir ka lir ta Moscow-i shia arur. Küm tetenzüklen Russia indang Foreign Minister Sergey Lavrov-ia yimjung tezüngzüktep kecha nunga Zelenskyy meyongnem magizüksü, ta shia liasü.

"Documents nung meyongnem agütsütsüsa tensa arudang, meyongnem agütsür ya tejangja nisung ka nüngdaktsü,



asir Zelenskyy ya iba nisungju masü," ta Sergey Lavrov-i ashi.

Kremlin-i Zelenskyy ya Ukraine indang tejangja lenir masü saka "de facto head of the regime" ka ama repranger, ta paisa shia liasü.

United Nations General Assembly nung jembidang, Zelenskyy-i ceasefire teimla mali asir Moscow-i yimjung mejangrar, ta shia liasü.

Russia-i Ukraine nunger tanur meyirijang aika pua bener aor, civilian infrastructure nung tenük yoker asir Europe tashi mait kumdaktsür, ta pai aitsü.

"Ukraine nunger ya azüdokshi mapanga tesunep

aliba nisungtem lir. Ozü linük indang tanurtem kidangi anir shilangtsü asoshi mapang kobika agitsü?" ta pai ashi.

Europe-i mera magira Moldova ya Russia- küboki aittsü ta pai tekumdangtsü ashi asir alima nung lenurtem dang Kyiv yaritsü ajungshia liasü.

"Ukraine ket nung missiles tulu mali. Onok takum alitsü temeden kumzüka ayutsü asoshi onoki drones yanglutsüsa akumer. Black Sea nung onoki takok angu, kechiaser Russia-i onok nem danga lenmang metoktsü," ta Zelenskyy-i ashi.

"Shidakbaji tongmelang: Khen lir alima indang rongnendak asir rong kumzüka ayutsü merangba dang nungi tang Putin soita ayuba talangba asütsü. Alima nung nük-nü toktepa yangluba dang temelaba asütsü. Rara agi nisung tali aika tongogo. Russia-i iba rara tanen makai atsür aodang ola madoki teli. Imlibilema ola adokang asir aijang," ta Zelenskyy-i UNGA nung ashi.

Hasina mechi India-Bangladesh tesendaktep mejungi lir: Yunus



New York, Rongjui/Sept. 25 (Agencies): New Delhi-i Bangladesh indang taoba ato kilonser Sheikh Hasina jenoktsü maongka agütsüba sülen India asir Bangladesh tsüngta tesendaktep mejungi lir, ta Bangladesh indang interim government nung Chief Adviser Muhammad Yunus-i ashi.

Yunus ya United Nations General Assembly (UNGA) indang senden 80 buba nung adentsü asoshi New York nung lir, asir paisa Hasina atsüngdoka kaketshir temi longkak aitba India-i maginü,

ta ashi.

"Tang onok India den mangatettep lir, kechiaser kaketshirtemi inyaka aliba parnoki maginer. Parnoki Hasina, taoba ato kilonser, jenokdakja lir, shibai item tebilemtsü ajunga yanglua lanurtem tepsetdaktsü. Ibaji ajanga India asir Bangladesh tsüngta mangatettep jenti adok," ta pai ashi.

Bangladesh lenir-isa kaketshir temi longkak aitba ya "Islamic movement" ka lir ta sangdongba osang taila aitsü.

"Ano külem osang taila

adoka ibai kanga majung asir ibai Islamic movement ta tiaziü olulu prokshi. Item ya Taliban nunger, shirnoki Bangladesh agi ta ashi. Parnoki nia Taliban züngsem ka ta ashir," ta pai ashi.

Yunus-i SAARC linüktem ya kinunger ama lir ta ashi asir iba telok ya asendenshitsü ayongzük, koba küm ter jungnüa mapa meinyaki arur.

Kaketshir temi longkak aita Hasina-i Bangladesh nung küm 15 yimsü süa aruba yimli laodaktsü asir August 5, 2024 nü la India-i jena ao. La jena aoba sülen Yunus lenisüba kübok interim government ka kumtet, shibai taruba küm election agitsü shia lir.

Taküm April ita India Ato Kilonser Narendra Modi-i Bangkok nung BIMSTEC Summit mapang Yunus ajurua India-i democracy aliba, tashi ita yimjung nung ajak dena terenlok aliba Bangladesh atema nokdaker, ta shia liasü.

Modi-i tensa mejungi kumdaktsüba o mejembi tajungba ta shia liasü.

North Korea-i nuclear nok-nü bendener: Seoul

Seoul, Rongjui/Sept. 25 (Agencies): North Korea-i nük-nü yangluba nung amshiba Uranium aika bendena lir südi ta South Korea-i ashi.

Brehostibarnü Seoul indang Unification Minister, Chung Dong-young ajanga ashiba agi, Pyongyang ket nung "highly enriched uranium" seret 2,000 shi lir, asir iba "purity" ya shilem 90 mesüra timba lir.

Iba ya tejangja asünungbo, North Korea indang nuclear oset bendenba nung kanga agi tali akumer asütsü.

Civilian experts temi itdangiter osang agütsüba nung North Korea indang enrichment plants pezü lir, ta pai ashi.

"Tangya North Korea indang uranium centrifuge ya tesem pezü nung mapa inyaktar," ta Chung-i osangbener dang ashi saka Yongbyon tenüng dang amshi, koba Pyongyang-i jembishinü akaba sülen decommission asü saka 2021 küm tanaben lapokshi.

North Korea-i uranium-enrichment sites tasen yangluloka alitsü südi ta bendanger mongin temi ashir, kechiaser North Korea lenir Kim Jong Un-i par nuclear arsenal ulushitsü asoshi kanga temulung agütsür.

Mapang talangka nungi Pyongyang ket nung enriched uranium aika aliba meteta lir, koba nuclear warheads yanglutsü asoshi tongtipang oset ka lir, ta South Korea indang defence ministry ajanga ashi.

Nuclear nok-nü ka atema 'highly enriched uranium' seret

42 nüngdaker, ta International Atomic Energy Agency (IAEA) ajanga ashir, anungji seret 2,000 yagi nuclear bombs 47 shi yanglutettsü.

Chung-i North Korea indang nuclear sentong anendaktsütsü ya tekeraba nung inyaktsüla ta ashi saka sanctions ya teperi masü asir lenmang ajak agi Pyongyang asir Washington tsüngta senden amentsüla ta ashi.

North Korea indang nuclear sentong tatem kati arudaktsütsü asoshi linük balalai inyaktepba 2019 nungi anendaka lir. Iba küm Kim asir United States Tir Donald Trump tsüngta senden amenba nung telemtetba kecha makai tembang.

Tawa ang Kim-i US den jembishinü akatsü mulunga lir, saka North dang nuclear nok-nü bendanga agütsütsü akhangba ya 'condition' ka alitsüla, ta ashi.

North Korea-i mezüngbuba nuclear tendangba ya 2006 küm liasü asir parnoki iba nok-nü yangluba yong United Nations nungi temerenshi balala agüja lir, saka parnoki kodanga yimjak nung uranium enrichment facilities indang sangdonga mali.

June ita South Korea tir akumsang Lee Jae Myung-i Pyongyang den tajunglen nungi angatetteptsü nangzüka lir.

South Korea indang taoba administration-i Pyongyang ya "main enemy" ta nüngja agüja mezüng denuclearization asütsü ajungshiba ajanga North Korea-i nuclear tashi tanen makai uludaktsü, ta Chung-i ashi.

Trump-i Pakistan PM den Oval Office nung senden amentsü



Washington, Rongjui/Sept. 25 (Agencies): Region nung tesendaktep yanglushitsüsa, US Tir Donald Trump-i Brehostibarnü White House nung Pakistan Ato Kilonser Shehbaz Sharif den ajuruteptsü lir, ta administration ajanga ashi. Iba senden ya Oval Office nung amentsü, kong osangbenertem memelar.

PM Sharif meina Pakistan indang Chief of Army Staff, Field Marshal Asim Munir adentsü, koba tongtipang "military-diplomatic mission" ka lir ta ashir. Munir ya Bodhbar aonung Washington tongogo.

Osang kar ajanga ashiba agi, iba senden nungya region nung tongtipang sentongtem asir

alima tashi melenshiba indang jembitsü.

Linük ana lenir tsüngta Pakistan-Afghanistan arütsülen kiralongrar inyaksangshi tali akumba indang asir talisa cross-border militant networks asir region nung Islamic States asendenshiba nung rangloker jembishinü akatsü.

US asir Pakistan tsüngta counterterrorism cooperation asendenshitsü indanga jembitsü, koba Afghanistan nungi America nunger ainshiba sülen raksar lir.

Pakistan nung 'rare earth mineral' bushia agitetsü asir toztü atsütsü atema jembishinütsü, koba ajanga US company tem asoshi economic frontiers tasen lapoktsü.

Pakistan-Saudi Arabia defence pact indanga jembitsü, koba Washington asoshi tebilemtsü tulu lir.

Arabian Sea asir Indian Ocean nung Pakistan indang Gwadar Port ajanga China nunger tashi ulua akumba asir Afghanistan-i US sepaitem meyipa shilangtsüba indanga jembitsü akok ta ashir.

GOVERNMENT OF NAGALAND

DIRECTORATE OF EMPLOYMENT SKILL DEVELOPMENT & ENTREPRENEURSHIP

NAGALAND: KOHIMA.

PRESS RELEASE

NO.DESE-9/02/2021:/1186

All passed-out trainees of Government Industrial Training Institutes (ITIs) of Nagaland for the following sessions who have not claimed their stipend are directed to complete their enrollment through the provided link below:

2021-22/23 and 2022-23/24 Batches - both 1 - year and 2 - year trade trainees

2023-24 Batch - 1 - year trade trainees

2023-25 Batch - 1st - year trainees of 2 year trades

Enrollment Link : <https://serviceonline.gov.in/directApply.do?serviceId=2600>

For enrollment, all concerned trainees are requested to visit their respective Government ITI at the earliest.

The last date for enrollment is 31st October 2025. No further claims will be entertained after this date under any circumstances.

Dated Kohima, the 25th Sept. 2025.

Sd/- SAVIO VISA

Director

NSFMM Trophy: Kuki United FC-i goal 5 agi Medziphema FA akok BFI-i Asian Youth Games atema asayartem sangdongogo



Kohima, Rongjui/September 25 (TYO): Brehostibarnü Chümoukedima Football Stadium nung NSF Martyrs' Memorial Trophy nung Kuki United Football Club, Manipur-i Medziphema Football Academy kokogo.

Chümoukedima Football Stadium nung telok kati dang

amokbanger asayaba asaya ka nung Kuki United-i goal 5-0 agi Medziphema FA koka liasü.

Asaya nung Paonaldo Kuki-i minute 6, 26 aser 76buba nung goal asem idakja hat-trick ka agütsü aser Seivanglen Kuki aser Ngamjakai Kuki natia minute 45 aser 53buba nung goal kaka idakja liasü.

Iba asaya nung match patron ji SDO (Civil) Chümoukedima, Chumbenthung Murry liasü aser pai player of the match naroküm Paonaldo Kuki nem agüja liasü.

September 26 nü asaya: Damokles FC Medziphema vs Viswema FC @5pm.

West Indies den Test asayamung atema India team sangdongogo

Rongjui/September 25, 2025 (Agencies): West Indies den Test ana asayatsü aliba atema India team sangdongogo, kong Ravindra Jadeja vice-captain asütsü. Ajisüaka imla aliba ama Karun Nair meshim aser Devdutt Padikkal züngoksemogo.

Team nung ano Abhimanyu Easwaran-a densema mali, shiba Australia aser England na den asayatsü shimba squad nungbo densema liasü, saka tang tashi India tenüng nungi khen danga asaya mali.

"Onoki kidang opener tasembuba menügdaker," ta Abhimanyu meshimba indang Agarkar-i ashi. Rishabh Pant-a temang tajungba makümba ajanga team nung mezüngoksem. England nung oa asayaba mapang pa vice-captain liasü. Pa meleni iba asayamung atema Ravindra Jadeja vice-captain asütsü shimogo.

Team nung Dhruv Jurel aser N. Jagadeesan na specialist wicketkeeper asütsü aser Jurel ang asayatsü imlar.

Squad nung tanungba asayartem kangabo temelenshi mali. India nung asayar asünung spin bowler kanga tongtibang

asütsü ta angateta team nung Ravindra Jadeja, Washington Sundar, aser Axar Patel nunger spin-bowling allrounder asütsü shimogo aser Kuldeep Yadav-a züngoksema lir.

Kasa mapang nung Nitish Kumar Reddy fast-bowling allrounder asütsü aser Jasprit Bumrah, Mohammed Siraj, aser Prasidh Krishna nunger first-choice pacer tem asütsü.

West Indies den asayamung atema India squad:

Shubman Gill (c), Yashasvi Jaiswal, KL Rahul, Sai Sudharsan, Devdutt Padikkal, Dhruv Jurel, Ravindra Jadeja, Washington Sundar, Jasprit Bumrah, Axar Patel, Nitish Kumar Reddy, N Jagadeesan, Mohammed Siraj, Prasidh Krishna, Kuldeep Yadav.

India indang Test captain tasenba Shubman Gill lenisüba nung India team tang mezüngbuba kidang Test asayamung ka asayatsü lir. Pa lenisüba nung India team England nung oa asaya koba 2-2 nung tembanga liasü. England den asayaba asayamung ya India asoshi 2025-2027 World Test Championship cycle nung

mezüngbuba asayamung liasü.

West Indies den mezüngbuba test asaya ya October 2 nü nungi tenzüka Narendra Modi Stadium, Ahmedabad nung asayatsü aser tanabuba Test ya October 10 nü nungi tenzüka Arun Jaitley Stadium, New Delhi nung asayatsü.

West Indies team asoshi iba asayamung ya ICC WTC cycle tasembuba nung tanabuba asayamung asütsü. Parnok June-July ita kidang Australia den asayamung ka asayaogo. WI team nung left-arm spinner Khary Pierre tang mezüngbuba züngoksemogo.

Selection committee mendenbuba Ajit Agarkar tang Asia Cup atema United Arab Emirates nung oa lir asünung, team shimsü asoshi senden ya online ajanga agia liasü. Iba asayamung atema asayar shimba ya committee züngsem S. Sharath aser Subroto Banerjee na asoshi tatembangbuba liasü.

September 28 nü BCCI AGM mapang Sharath aser Banerjee na ya Pragyan Ojha (South Zone) aser R.P. Singh (Central Zone) nati melenogo.

SC-i AIFF constitution agizükogo, Kalyan Chaubey kümsük tema inyaksü

New Delhi, Rongjui/Sept. 25 (Agencies): Supreme Court-i All India Football Federation (AIFF) dang draft constitution tasenba kübok maparen inyaksü melaogo, anungji Indian football ketdangsüba tsütsü küm aika terata nung aruba tatem kati arur.

Court-isa tir Kalyan Chaubey-i anir tang aliba executive committee kümsük tembanga inyaka election tasen 2026 nung agütsü melaogo.

Justices Sri Narasimha aser A.S. Chandurkar aliba Bench kati AIFF dang constitution tasenba agizütsü asoshi hopta pezü tsünga lokti senden ayongzütsü totuyuba agütsüogo.

Iba obendang ya kanga nüngdaka liasü, koba ajanga federation inyakyim maneni alitsü melar, commercial deals yanglutetsü aser ketdangsüba

temelenshi nung rangloktüsü.

AIFF Secretary General M. Satyanarayan-i iba telemtetba pela agizük. "Takok angurji Indian football lir. Supreme Court telemtetba ajanga tejangja aser tashi agütsür. Tang asenoki ken o atsütepba nung merangloki temelenshi aser terenlok asoshi temulung agütsütsü," ta pai ashi. AIFF-i ochishia state associations den tesendaktep tashi itshitsü aser FIFA aser AFC guidelines nung aliba ama inyaksü, ta paisa ashi.

Court ajanga temelaba agütsüba yong AIFF-i Indian Super League (ISL) deal tasen ka atema Football Sports Development Limited (FSDL) den jembishinü tenzüksütsü lenmang lapoktsür, kechiaser tang aliba contract ya December ita tembangtsü.

Super Cup aser ISL densema linük telungzüik nung asayamung tem tarendak makai ayongzüktetsü aser national teams tem CAFA Nations Cup densema international fixtures asoshi renemtsü nüngdaka aliba tashi agütsür.

Indian football ya 2017 nungi Supreme Court kübok lia aru aser iba mapang linük nung tematiba court ajanga federation dang constitution tasen ka mezüng yanglutsü shia liasü.

2023 küm taoba Justice L. Nageswara Rao-i benokba constitution nung mangatettep liasü, anungji ketdangsüba temelenshi aser commercial agreements nunga menudaktsü aser FIFA nungia constitution ya October 30 tashinung tejangja magütsüra suspend sütsütsü tekumdangtsü shia liasü.

New Delhi, Rongjui/September 25 (TYO): Boxing Federation of India (BFI)-i Brehostibarnü, 3buba Asian Youth Games 2025 atema züngsem 23 agi kümtetba squad ka sangdongogo. Iba asayamung ya Bahrain nung asayatsü.

Asayamung atema NS NIS Patiala nung September 23 nü training camp tenzükogo aser October 20 nü tembangtsü.

6buba U-17 Junior Boys & Girls National Boxing Championship 2025 nung asayaba dak ajemdaker team ya shimogo, kong gold medalists tem team-i indang indanga iogo aser silver medalists tem pei tata category nung reserve asayar ama shimogo, ta Boxing Federation of India (BFI)-i metetdaktsü.

Iba asayamung atema shimer aliba asayartem rongnung taküm July ita Asian U-17 Championships nung takok tajung angurtem densema lir. Iba asayamung nung India team-i medal 43 ngua parnok tanabuba jenjang nung tembanga liasü. Iba takok ajanga India team youth boxing nung kanga tashi

ita akümba sayur.

"Taoba ita ishika tsüngda linük nungi lanur boxer temi parnoki Asia nung tajungtibatem den tokteptetsü ta sayua continental aser national jenjang nung takok tajung nguogo. Iba camp ya parnok sempet arangttsütsü aser Bahrain nung medal angutsü atema renemshitsütsü asoshi ayongzüka agidar," ta BFI tir Ajay Singh-i ashi.

Asayartem ya tebur tenet aser tetsür tenet lir aser parnok meina coach trok, physiotherapists ana aser doctor ka aotsü. Asayartem rongnung gold medalists Dhruv Kharb, Udham Singh Raghav, Khushi Chand, Ahaana Sharma, aser Chandrika Bhoreshi Pujari nunger densema lir, shirnok head coach Vinod Kumar (Boys U-17) aser Jitender Raj Singh (Girls U-17) na tawabangba kübok training agidar.

Team nung sempet tajung aketertem aser takok ngur alirtem densema lir aser parnoki Asian Youth Games nung junga asayateta takok tajung bener arutsütsü imlar.

T20I Rankings: Abhishek & Varun na maneni temaba jenjang nung lir

Rongjui/September 25, 2025 (Agencies): ICC Men's T20I rankings nung asayartem aika jenjang meleshia tejakdangi tuaka India nunger asayar Abhishek Sharma aser Varun Chakravarthy na batting aser bowling chart nung maneni temaba jenjang nung lir.

Asia Cup Super Fours nung Pakistan den asayaba mapang wicket ka danga magiaka Chakaravarthy-i run magütsüi (0-25) ball kanga junga onogo, aser iba ajanga scoring rate azüoka liasü aser iba ajanga pai rating point 14 ngua pa maneni temaba jenjang nung lir. Bowler tem rongnung all-rounder Hardik Pandya jenjang trok tejakdangi tua tang 60buba nung lir aser T20 all-rounder rankings nung pa maneni temaba jenjang nung lir.

Kasa mapang nung Abhishek-i tang asaya aliba Asian Cup nung India team mezüngbuba asaya Oman den asayaba mapang run 38 yanglu aser iba sülen Deobarnü Pakistan akokba asaya nung pai run 74 yanglua liasü.

India nungersa Tilak Varma, shibai Pakistan den asayaba

mapang run arishiba nung teyari tulu agüja out mesüi ball 19 nung run 30 yanglu, pa batting rankings nung tang tasembuba jenjang nung lir.

Maneni Pakistan nunger leg-spinner Abrar Ahmed-a bowler tem rongnung tang pezübuba nung lir. Pa jenjang 12 tejakdangi tua liasü.

Bangladesh nunger left-arm pacer Mustafizur Rahman-a jenjang trok tejakdangi atuba sülen maneni top 10-i iogo. Pai taoba asaya ana nung wicket trok agia liasü. Pakistan nunger bowler Haris Rauf-a (jenjang 9 tejakdangi tua 28) jenjang junga kümogo.

Batter tem rongnung Sahibzada Farhan jenjang 31 tejakdangi tua 24buba tongogo aser Hussain Talat-a tang 234buba nung lir aser Bangladesh nunger asayar Saif Hassan-a jenjang 133 tejakdangi tua tang 81buba nung lir.

All-rounder tem rongnung Pakistan nunger asayar Faheem Ashraf jenjang 12 tejakdangi tua tang 39buba nung lir aser Sri Lanka nunger asayar Wanindu Hasaranga-a tenetbuba tongtetogo.

BILEMDANGANG

"Anogoshia tali shizüka alitsü merangang."